



12. august 2011
25. januar 2011

UKA 2011/24
UPA 2011/48

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Kingusinnerpaamik UPA12-mi suliariumannittussarsiuussinermi misissuineramik saqqummiussinissamut Naalakkersuisut peqquneqarnissaannik Inatsisartut aalajangiiffigisassaattut siunnersuut, paasiniarlugu suliariumannittussarsiuussinerni aningaasatigut allaffissornikkullu sipaartoqarsinnaanersoq, suliani ullumikkut Namminersorlutik Oqartussanit aamma Namminersorlutik Oqartussat suliffiutaannit ingerlanneqartartuni. Misissuinermi aamma siunertaassaaq suliat pisortanit ingerlanneqartartut sorliit namminersortunut imissutigineqartarsinnaanersut nassuiarnissaat tikkuarnissaallu aamma sipaarutaasinnaasut taggillugit taamaasilluni suliat ukiup tullianut aningaasanut inatsisissamut ilanngunneqarsinnaalersillugu.

(Inatsisartunut ilaasortaq Niels Thomsen, Demokraatit)

Tunngavilersuut

Piviusuuvoq aningaasarsiornikkut annertuunik unammilligassa qaratta. Unammilligassat taakkua angisuut aaqqiivigiumallugit pisariaqarpoq tamakkiisumik isiginnittumik iliuuseqarnissaq. Iliuuseqarnerup ilagissavaa, pisortat namminersortullu ingerlataanni suliaqarnerup oqimaatigiinnerata nikisinnissaa.

Misissuinerit assigiinnigitsut ataatsimut takutippaat, ineriartortitsinissaq eqqarsaatigalugu suliffeqarfinnik mikisunik akunnattumillu angissusilinnik ineriartorfissaqartunik peqalersitsinissaq unammillernartuusoq. Allatut oqaatigalugu ineriartortitsisariaqarpugut, tamatumani suliffeqarfiit mikisut aallarnisarnissaminnut periarfissaqartinneqarlutik, taamaaliornikkullu suliffeqarfimmik ingerlatsinermik pigaaruteqaqisunik misilittakkanik peqalersivissinnaalersillugit. Taakkua suliffeqarfiit mikisut akunnattumillu angissusillit piffissap ingerlanerani inuussutissarsiutini sikkeriartortuusuni kiffartuussinermik suliaqarsinnaalissapput.

Akileraarneq Atugarissaarnerlu pillugu Ataatsimiititaliarsuup takutippaa, 2006-mi pisortani sulisut 44 %-iusut. Tamatumani eqqarsaammi ilanngunneqartariaqarpoq, sulisut sinnerini annikigisassaangitsut sulimmata toqqaannartumik toqqaannangitsumillu pisortat akulerusimanerannik aallaaveqartumik.

Akileraarneq Atugarissaarnerlu pillugu Ataatsimiititaliarsuup aamma tikkuarpaa, sulisut ataatsimut isigigalugit suliffeqarfiit amerlanngitsut ineriartornerannik annertuumik sunnersima neqartut, tamassuma ilaatigut nunatta aningaasaqarnerata ajalusooriaannaanerannik naqissuseeqqippoq. Taamaammat unammilligassaq ersarippoq: Suliffeqarfiit mikisut akunnattumillu angissusillit aallarnisartariaqarput, taamaasiornikkut piffissami matumanerpiaq inuussutissarsiutit nutaat sikkeriartorfiini inuussutissarsiutikkut aaqqissuusnaanitta allanngoriartornerani pitsaanerpaamik inissisimajumalluta.



Tamanna tunngavigalugu misissuisoqartariaqarpoq qulaajaasumik suliat suut suliarinnittussarsiuunneqarsinnaanersut imaluunniit namminersortunngorsarneqarsinnaanersut. Siunertaangilaq aktieselskabinik nutaanik pisortanik pigineqartunik pilersitsinissaq. Killormulli siunnersuutiga aamma attuumatinneqartariaqarpoq kalaallit Namminersorneq Pillugu Isumalioqatigiisitaasa innersuussutaanut, suliffeqarfiit Namminersorlutik Oqartussat ingerlataasa inuiaqatigiinni aningaasaqarnermut sunniuteqarnerat annikillisarneqartariaqartoq suliffeqarfiit suliassami qiterpiaannanik ingerlatsilernerisigut. Namminersorneq Pillugu isumaliuutissiissummi ilaatigut oqaatigineqarpoq

”Ingerlatsiviit akitigut politikiat naammassisaqarsinnaassusaallu amerlasuutigut nunami inuussutissarsiornikkut ineriartortitsinerup sinaakkutarisassaanut aalajangiisuusarput. Siullermik suliassat namminersortut sulineranni sinaakkutassaasut ingerlatsivinnik pisortat pigisaannit aqunneqartarput. Tullianik ingerlatsiviit pisortanik pigineqartut angissusaannik aallaavilimmik tatisimanninneq pissutigalugu taakkulu tunisassiornermut akisussaaffigisaanni imaluunniit toqqaannangik-kaluartumik tunisassiornissamut pisussaaffigineqalersimasaannut unammillernissaq kissaatigineqarneq ajorpoq imaluunniit ajornartarpoq. (Namminersorneq Pillugu Isumalioqatigiisitat Isumaliuutissiissutaat, 2003: 344).

Taakkua saniatigut Demokraatit tunngaviusumik isumaqarput, suliarinnittussarsiuussinermi namminersortunngorsaaneermiluunniit suliap kivinneqarnerata pitsaassusaanut piunasaqartoqassasoq. Takorloorneqarsinnaavoq anguniagassiinermik imalinnik isumaqatigiissutinik atuutilersitsineq. Suliarinnittussarsiuussineq imaluunniit namminersortunngorsaaneq siunertaqassanngilaq aningaasaqarnikkut nunatta karsianut iluaqutaasussamik sipaarniuteqaannarnermik killormullu. Siunertarineqarsinnaavoq anguniagaassasoq, suliaq ullumikkut pisortanik kivinneqartartoq aningaasanut taakkununga namminersortunit pitsaassutsikkut pitsaanagerusumik kivinneqassasoq. Allatut oqaatigalugu ujartorparput akileraartartut akileraarutigisartagaat pitsaanagerusumik atorneqarnissaat.

Naammassisaqarluarsinnaanermik misissuinerpassuit takutippaat pisortat naammassinninnerat 30 %-mik akisunerusoq unammilleqatigiiffiusumi nammassinninnermiit.

Pisortanut aningaasaqarnikkut allaffissornikkullu kingunerisassai

Siunnersuut allaffissornikkut Namminersorlutik Oqartussanut kinguneqassooq allaffissornikkut sulisunik misissuisitsisoqassamat. Nalilerneqarpoq allaffissornikkut sulisut 1 ½ AC-t ukiumut suliarisinnaasaasa naatsorsornerattut 700.000 kr.-mik naleqassasoq. Tamanna allaffissornerup iluani aningaasaliissutigineqartunit pingaarnersiunikkut matuneqartariaqarpoq.

Namminersorlutik inuutissarsiortunut aningaasaqarnikkut allaffissornikkullu kingunerisassai

Namminersorlutik inuutissarsiortunut aningaasaqarnikkut allaffissornikkullu kinguneqassanngilaq. Paarlattuanik suliffeqarfiit mikisut akunnattumillu angissusillit aallartissinnaanissaat tunngavissinneqassooq. Taassumap saniatigut suliffeqarfiit pioreersut suliaminnik annertusaanissaat periarfissinneqassooq. Takorloorneqarsinnaavoq siunnersuutip piffissamut qanittumut isiginermi suliffeqarfiit pisortanik pigineqartut aningaasaqarnikkut kinguneqarfigissagai, tamannali kingunerluut suliffeqarfiit namminersortut mikisut akunnattumillu angissusillit isertitaqarluarnerusin-



naanerannik ineriartorsinnaanerannillu taarserneqassooq. Taamaasillunilu akileraarutigut tas-suunakkut tunngavissamik pitsanngorsaasoqassalluni.

Innuttaasunut aningaasaqarnikkut allaffissornikkullu kingunerissai

Innuttaasunut aningaasaqarnikkut allaffissornikkullu kinguneqassanngilaq. Pingaarnertut siunertaanngilaq aningaasartuutit annertusarnissaat sipaarniarfigineqarnissaalluunniit. Siunertaavorli innuttaasoq akileraarutinut taakkununnga pitsaassutsikkut pitsaanagerusumik kiffartuunneqarnissaa. Piffissap ingerlanerani periarfissaavoq kiffartuussinerit ilaanni innuttaasut akikinnerusumik kiffartuunneqartut, kiffartuussineq namminersortunit ingerlanneqartillugu.

Taamatut oqaaseqarlunga Naalackersuisut akissutissaannut kiisalu partiit allat oqaaseqaatissaannut qilanaarpunga.